

Newspaper	Berita Harian
Date	13/8/2014



MENJELANG BAJET 2015

(BH - 13/8/2014)

PM sasar tingkat taraf hidup rakyat

» *Ambil kira keperluan semua bagi realisasikan Wawasan 2020, negara maju*

Oleh Haika Khazi
mfaizul@bh.com.my

► Kuala Lumpur

Malaysia memerlukan bajet bertanggungjawab yang mengambil kira keperluan rakyat untuk merealisasikan Wawasan 2020 dan mencapai status negara maju, kata Datuk Seri Najib Razak.

Justeru, Perdana Menteri berkata, Bajet 2015 yang dijadual dibentangkan di Parlimen pada Oktober depan, diharap dapat terus merangsang pertumbuhan, menambah baik kedudukan fiskal negara serta meningkatkan taraf kehidupan rakyat.

Mampu capai sasaran

"Malaysia kini berada di ambang status negara maju. Bersama, kita mampu mencapai sasaran itu. Mari teruskan usaha kita," kata Najib dalam catatan terbaharu beliau di blog 1Malaysia bertajuk 'Bajet2015:

Mari Teruskan Usaha Kita'.

Bagi memastikan Bajet 2015 memenuhi kehendak rakyat, Perdana Menteri mengajak orang ramai menyuarakan pandangan serta keperluan mereka menerusi laman khusus serta Facebook beliau sendiri untuk dipertimbang.

"Saya mengalu-alukan cadangan anda semua. Saya sangat teruja dengan semua maklum balas rakyat sewaktu #Bajet2014 - sentimen tertumpu kepada segala-galanya, daripada perumahan hinggalah ke kebudayaan," katanya.

Najib, yang juga Menteri Kewangan, menarik perhatian apabila berkata walaupun ekonomi negara terus berkembang dan banyak peluang pekerjaan baharu diwujudkan, rakyat tetap merasai kesan daripada kenaikan kos sa-

ra hidup.


Katanya kerajaan sentiasa meletakkan kepentingan rakyat sebagai agenda utama dan kerajaan mengorak langkah dalam menangani isu-isu keperluan rakyat dengan merangka bajet nasional yang inklusif, seimbang dan bertanggungjawab.

Kekal kadar inflasi rendah

"Antara objektif utama kerajaan ialah mengurus kos sara hidup dan mengekalkan kadar inflasi yang rendah," katanya.

Menjelaskan lanjut mengenai isu itu, Najib berkata satu daripada langkah diambil kerajaan untuk memberi kemudahan kepada rakyat ialah dengan menyediakan alternatif yang baik bagi harga kereta.

"Selaras dengan kepesatan ekonomi Malaysia, bandar kita



“
Saya mengalu-alukan cadangan anda semua.
Saya sangat teruja dengan semua maklum balas rakyat sewaktu #Bajet2014”

Najib Razak,
Perdana Menteri

turut sama membangun dan amat penting untuk merangka jalan penyelesaian jangka panjang bagi meleraikan masalah kesesakan lalu lintas, menambah baik pengangkutan awam di Kuala Lumpur dan kawasan sekitarnya," katanya.

Bagi membantu golongan yang memerlukan, Perdana Menteri mengulangi komitmen kerajaan untuk meningkatkan bayaran Bantuan Rakyat 1Malaysia (BR1M) kepada RM1,200 setahun dalam tempoh lima tahun akan datang.

"BR1M adalah satu lagi langkah untuk membantu rakyat Malaysia menangani kenaikan kos sara hidup. Ia adalah subsidi tersasar yang diberikan berasaskan keperluan," katanya.

Ucap tahniah kepada Erdogan

Kuala Lumpur: Datuk Seri Najib Razak mengucapkan tahniah kepada Perdana Menteri Turki, Recep Tayyip Erdogan kerana memenangi pilihan raya Presiden negara itu yang kali pertama dibuat secara langsung pada Ahad lalu.

Hubungan lebih baik

"Tahniah Erdogan kerana menang pilihan raya Presiden. Malaysia berharap hubungan

lebih baik dan lebih strategik dengan Turki," kata Perdana Menteri dalam akaun Twitter beliau, semalam.

Dilaporkan Erdogan yang menjadi Perdana Menteri sejak tahun 2003 memperoleh kira-kira 52 peratus undi untuk dipilih menjadi Presiden Turki Ke-12.

Beliau dijangka mula memegang jawatan pada 28 Ogos ini. **BERNAMA**